

Me Muttasproch' gibt's nimmamehr

Me Muttasproch' is de Weeviertla Ui-Mundort. Ois Kina in de 1950er Johr homma's gonz söbstvorständli' g'redt – hob'm net g'wisst, dass's an onare Sproch' a no gibt. Wia ma in d'Schui' ee'tret'n san, homma Hochdeitsch lerna miass'n. 's wor net recht schwa und vornehm samma uns scho virkemma, wia ma so nowö gred't und fir d'Jaus'n vo da Muida „ein Schmalzbrat“ mitk'riagt hob'm. „Schön sprechen!“ hot's g'hoäß'n. Owa nomitto beim Fuißboina oda Bowot'n homma do wieda Plottarisch g'redt. Des hot vü besa zu uns 'passt, und g'weht wor' ma's a.

Späta donn wor' ma in ana onan Schui' oda in da Lehr', wo's d'Ui-Mundort womegli net 'kennt hob'm. Ausg'locht hätt'n's uns mit unsara Sproch'. Schnö homma uns umg'stöt, auf's ongeblich Weanarische und wonn's see hot miass'n a auf d'Schriftsproch'.

Mi'm Radio und vollends wia donn 's Fernsegh'n aufkemma is, do is unsa Mundort oiweu mehr vogess'n wor'n und fost gonz volor'n g'gonga. Mit **unsare Kina** homma Hochdeitsch g'redt, dass sa si in da Schui' leichta tan – a unnetiga Bledsinn. Owa **unsara Mundort** hot des in Rest g'geb'm: mir Oid'n kinnan's no, owa mit uns wird a unsa Muttasproch' voschwind'n und osterb'm.

Oanaseits is des ollaweu scho so g'wes'n, dass si a Sproch so long g'änat hot, bis's des Friare gor nimma zum Dakenna wor. Auf da onan Seit'n is des schod'. Mir tuit's richti weh, und i schau a mit meene Gedichta, dass i mithüf', dass de Ui-Mundort wenigst'ns wia a Denkmoi dahoit'n bleibt.

Sche wa's, wonn si a unsere Enk'lkina no ons „Plottarische“ erinnan kunnt'n.

16.11.2025